


Библия пэ ловарицко
романы щиб



Romani, Vlax: Библия пэ ловарицко романы щиб (Bible)

Библия пэ ловарицко романы щиб **Romani, Vlax: Библия пэ ловарицко романы щиб (Bible)**

copyright © 2021 Pioneer Bible Translators

Language: Romani

Dialect: Lovari

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-14

PDF generated using Haiola and XeLaTeX on 29 Aug 2024 from source files dated 15 Apr 2023
a9f56367-253c-5b5a-9293-02f08a0ea040

Contents

Рут	1
Иона	6

Кеньва па Рут

Элимелех ай лэско чөлэдо традэнтар андо Моав

1 Андэ дес, кана визэринас лэ вайды, андо тхэм кэрдилас бокх, ай екх мануш катар Вифлеем, андэ Иудея, традас тэ трайж куса пэски ромни ай дуе щявэнца андо тхэм Моав.

2 Кадо мануш бүшёлас Элимелех, ай лэски ромни — Наоми, ай лэ дуй лэскэ щявэ — Махлон ай Килион. Вон сас катар Эфраты анда Вифлеем, кай сы андэ Иудея. Вон авилэ андо Моав ай траинас котэ.

3 Элимелех, ром ла Наомияко, мулас, айвой ашилас дуе щявэнца.

4 Вон лынэ ромниятанжэн — екх лэндар бүшёлас Орпа, ай э кавэр Рут. Пала кодо сар вон траисардэ котэ каринг э дэш бэрш,

5 Ви Махлон ай Килион мулэ, ай Наоми ашилас би щявэнго ай ви би ромэско.

Наоми болдэл-пэ палпалэ андо Вифлеем

6 Наоми шундас андо Моав, кэ о Рай Яхва ажутысардас пэскэ манушэнгэ ай дас лэн хабэ, ай Наоми пэскэ боранца гэтосайлас тэ болдэл-пэ кхэрэз.

7 Пэскэ боранца вой аяядас тхан, кай траяяс, ай гэлас андо дром, саво трубуяс тэ анэл лэн палпалэ андэ пхув Иудаски.

8 Наоми пхэндас пэскэ борангэ:

— Болдэн-тумэ сако андо пэска дако кхэр. Мэж о Рай Яхва авэл милошо каринг тумэ, сар ви тумэ санас милоша кай тумарэ мулэ ром ай мандэ.

9 Мэж дэл о Рай Яхва саконакэ тумэндар тэ аракхэл пачя андо кхэр кай нэво ром. Вой чюмидас лэн, ай вон зуралэс рутэ

10 ай пхэндэ лакэ:

— Амэ жяса туса кай тирэ мануш.

11 Алом э Наоми пхэндас:

— Болдэн-тумэ палпала кхэрэ, мурэ щея. Состар тэ жян манца? Мандэ наштык авэн инкэ щявэ, савэ кэрдёна тумарэ ром.

12 Болдэн-тумэ кхэрэ, мурэ щея; мэ аба сым пхури, тэ авэл ма кавэр ром. Ви тэ гиньдисардэмас, кэ си ман бизыяла, — ви андэ кады рати тэ авилэмас ромэса, ай катар кэрдэмас щявэн, —

13 сар тумэ жутярна, жи пун вон барона? Шай ли тумэ ашен са кады врама би ромэнго? На, мурэ щея. Мури брига зуралэс пхари тумэнгэ, анда кадо кэ о васт лэ Раско лэ Яхваско болдас-пэ чёрэс каринг мандэ!

14 Ай атуучи вон пала зуралэс рутэ. Ай э Орпа чюмидас пэска сокра по палуунгэ, алом э Рут ашилас ласа.

15 — Дыхы, — пхэндас Наоми, — тири бори болдэл-пэ палпалэ кай пэскэ мануш ай кай пэскэ дэвла. Болдэ-ту ви ту ласа.

16 Алом э Рут пхэндас:

— На кийидэ пэ мандэ, тэ мэкаас тут вай тэ болдав-ма тутар. Кай жяса ту, котэ ви мэ, ай кай ту аяядёса, аяядював ви мэ. Тирэ мануш авна мурэ мануш, ай тиро Дэл авла муро Дэл.

17 Кай мэрэс ту, мэрэв ви мэ, ай котэ аво прахомэ. Фэри о мэрипэ лэл ман тутар. Мэж марэл ман о Рай Яхва зуралэс, тэ авла кавэрэс.

18 Кана Наоми аяядас, со э Рут щютас-пэ зуралэс тэ жял ласа, вой аяядилас тэ марэл ла тэлэ.

19 Ай солдуй жювля гэлэ май дур, жи пон чи авилэ андо Вифлеем. Кана вон дынза андрэ, са о форо бугзыайлас анда лэндэ, ай лэ жювля пхэннас:

— На кады э Наоми?

20 — На акхарэн ман Наоми, — пхэндас вой лэнгэ. — Пхэнэн мангэ Мара, анда кадо кэ о Май Зурало кэрдас кэрко муро траё.

21 Мэ гэлэмтар анда кадо форо барвалы, ай о Дэл болдас ман палпалэ би канческо. Состар тэ пхэнэн мангэ Наоми? О Рай Яхва щюдас ман андэ брига; о Май Зурало мэклас пэ ман бида.

22 Кадэ Наоми болдас-пэ анда Моав пэска бораса, моавитянкаса ла Рутаса. Вон авилэ андо Вифлеем, каны мануш лынэ тэ кидэн ячмень.

2

Рут маладёл лэ Боазоса

1 Кай лэ Наоми сас нямо па лакэ ромэски риг анда коды жэ вица, со ви о Элимелех, барвало ай пативало мануш, по анав Боаз.

2 Моавитянка Рут пхэндас ла Наомиякэ:

— Жывтар мангэ пэ маля тэ кидав па пхув сэмно пала бутяра, котэ, кай авна мануш лаше каринг мандэ.

Наоми пхэндас лакэ:

— Жя, мури щей.

3 Вой гэлас ай лас тэ кидэл, со ашёлас пала бутяра. Кэрдилас кадэ, со вой авилас пэ коды риг лэ маляки, сави сас лэ Боазоски анда вица Элимелехоски.

4 Ворта андэ коды врама анда Вифлеем авилас Боаз ай дас опрэ лэ бутярэнго дес:

— Мэк тэ авэл тумэнца о Рай Яхва!

— Алдый тут о Рай Яхва, — пхэндэ вон палпалэ.

5 Боаз пущлас кай май баро пэ кидэтора:

— Каски коды тэрны жювли?

6 О баро пхэндас:

— Кады моавитянка, кай болдас-пэ палпалэ э Наомияса анда Моав.

7 Вой пхэндас: «Мангав тут, дэ ман тэ кидав опрэ сэмно, кай пэлэ пала кидэтора». Вой авилас пэ мал ай инкэрдёлас катэ катар о гайнало жи аканак; ай фэри эк-цэра годоныяс тэла тэтэво.

8 Боаз пхэндас э Рутакэ:

— Шун ман, мури щей. На пхир тэ кидэс пэ кавэр мал ай на дуурарту катар. Аш катэ муро бутярицэнца.

9 Дыкх, пэ сави мал кидэн мурэ мануш, ай инкэрдюв кхэтанэ лэ жювлянца. Мэ пхэндэм мурэ бутярэнгэ тэ на азбан тут. Ай каны камэса тэ пэс, жя ай пи анда хкорэ, савэ пхэрдярэн мурэ бутяра.

10 Вой бандилас мусеса каринг э пхув ай цыписардас:

— Состар ту сан кадэ лашё каринг мандэ, состар сунус кадэ лэ каврэ-тхэмэска жювлия?

11 Боаз пхэндас:

— Мангэ панааскодысардэ па са, со ту кэрдан тира сокракэ, каны мулас тиро ром: сар ту ашядан тирэ дадэс ай да ви пэски пхув ай авилан тэ траис кай лэ мануш, савэн ту май англал чи жянэсас.

12 Мэк дэл тут лашипэ о Рай Яхва анда кадо, со ту кэрдан. Тэ лэс ту баро миштыпэ катар о Рай Яхва, Дэл Израилёско, каринг Саво ту авилан тэ аракхэс пачя тээла Лэскэ пхака.

13 — Тэ аракхо ви май дур милошаго андэ тирэ яхха, муро рай, — пхэндас вой.

— Ту чендээшигардан ман ай ворбисас манца лащимаса, ви чи дыкхлан по кодо, кэ чи сым анда тирэ бутярицы.

14 Боаз, каны халас, пхэндас лакэ:

— Пащув катэ. Лэ манро ай бол лэс андэ шуклы мол.

Кана вой бэшлас паша кидэтора, вов дас ла пэко див. Вой халас, кати камлас, ай инкэ ашилас.

15 Кана вой ушилас тэ кидэл май дур, Боаз дас аври пэскэ бутярэнгэ:

— Ви тэ кидэлавой машкар снопы, на шэртын ла.

16 Кэрэн кавэрэс, щюдэн лакэ колосья анда кодал, со кидэ, ай ашявэн лакэ тэ ваздэл па пхув, ви на щюдэн пэ яхса лакэ.

17 Кадэ кидэлас э Рут пэ мал жи по мизмэри. Кана вой мардас аври о сэмно, саво кидас, кэрдилас каринг допаш гоно*.

18 Вой андас лэс андо форо, ай лаки сокра дыкхлас, кати бутвой кидас. Инкэ Рут лас аври ай дас ла кодо, со ашилас латэ анда хабэ.

19 Э сокра пущлас латар:

— Кай ту кидэсас адес? Кай бутязысас? Мэж тэ авэл алдымэ кодо мануш, саво ажкутысардас тукэ!

Рут пхэндас лакэ, каастэвой кэрдас бути.

— Мануш, каастэ мэ адес кэрос бути, бүщёл Боаз, — пхэндасвой.

20 — Алдый лэс о Рай Яхва! — пхэндас Наоми пэска боракэ. — Вов чи ашядас би милошако чи жювиндэн, чи мулен.

Котар щютас пашэ:

— Кадо мануш амзнгэ пашутно нямо.

21 Рут моавитянка пхэндас:

— Вов инкэ пхэндас мангэ: «Ашт мурэ бутярэнца, жи пун кидэна са муро сэмно».

22 Наоми пхэндас пэска боракэ ла Рутакэ:

— Кадо мишто, мури щей, со ту лэса тэ пхирэс лэскэ бутярицэнца, анда кадо кэ э кавэрски мал тут шай шэртысардо.

23 Рут инкэрлас-пэ лэ Боазоскэ бутярицэнца, жи пон лэ мануш кидэ са о ячмень ай див. Ай траяис кай пэски сокра.

3

Рут ай Боаз котэ, кай ужарэн сэмно

1 Екхвар лаки сокра Наоми пхэндас лакэ:

— Ашта, мури щей, аракхав тукэ тхан, кай тэ траис андэ пачя.

2 Дыхк аканак, о Боаз, каскэ бутярицэнца ту санас, амэнгэ нямо. Адес по мизмэри вов авла, кай ужарэн сэмно.

3 Атунчи тхов-ту, маих-ту сагангэ улыненца ай урав тирэ май шүкар гада. Жя котэ, кай ужарэн сэмно, алом на сыкадюв лэскэ, жи пун вов хала ай пэла.

4 Кана вов пашлёла, лэ сама, кай пашлёт. Котар жя, ваздэ капа па лэскэ пунрэ ай пашлюв. Вов пхэнла тукэ, со тэ кэрэс.

5 — Мэ кэро са, сар ту пхэнэс, — пхэндас пэ кадо э Рут.

6 Вой гэлас по кадо тхан ай кэрдас са, со пхэндас лаки сокра.

7 Кана о Боаз ашядилас тэ хал ай тэ пэл ай лэско ило ковлилас, вов гэлас ай пашлилас пэ дурутны риг, кай сас кидыны суулума. Рут пашылас локхорэс, ваздас э капа па лэскэ пунрэ ай пашлилас.

8 Пэ допаш рат вов издряяс, пиписардас паша пэстэ ай аракхлас э жювля, сави пашлёлас паш лэскэ пунрэ.

9 — Кон сан? — пущлас вов.

— Мэ сым тири бутярица Рут, муро рай, — пхэндасвой. — Лэ ма андо тиро кхэр*, чяк сан екх анда амарэ май пашутнэ нямо, кон фирий амэн.

* **2:17** В древнееврейском употребляется слово эфа, мера сыпучих веществ, равная приблизительно 20-22 литрам.

* **3:9** Андо еврейско тексто си скриптардо: «Щярав ма те гадэско агорэса», со атярдёл сар: «Лэ ма ромнякэ».

10 — Алдый тут о Рай Яхва, мурى щей, — пхэндас вов. — Кадо лашё баё си май баро, сар ту кэрдан англа кадо: ту чи лан тэ нашэс пала тэрнэ мурш, — чи пала барвалэ, чи пала чёрэ.

11 Ай аканак, мурى щей, на дара. Мэ кэрэв тукэ са, со ту мангэс. Са муро форо жянэл, со ту сан пативалы жювли.

12 Мэ сым тиро пашутно нямо, алом си нямо инкэ май пашэ мандар.

13 Аш пэ рат катэ, ай ёкор, тэ камла вов тэ авэл тиро фирмтори, атунчи мишто — мэк тэ авэл. Ай тэ на камла, кадо кэрэ мэ; кадо си чячипэ, сар си чячипэ, кэ о Рай Яхва си траимэ. Сов катэ жи ко ёкор.

14 Айвой пашлётас паша лэскэ пүнрэ жи ко ёкор, алом ушилас, кана инкэ чи десайлас, кана инкэ наштык сас тэ пинжярэл ех мануш лэ каврэс. Боаз пхэндас пэскэ: «Мэк коник тэ на жянэл, кэ кады жювли сас катэ».

15 Вов пхэндас лакэ:

— Дэ мангэ тиро пхикэнго дыкло, саво си пэ тутэ, ай инкэр лэс.

Кана вой кэрдас кадо, вов щютас андо дыкло ячмень, шов меры, ай жутысадас лакэ тэ Ѣёл пхарипэ пэ пхикэ. Пала кадо вов гэлас палпалэ андо форо.

16 Кана э Рут авилас қай пэски сокра, Наоми пущлас:

— Сар, мурى щей?

Айвой панаскодысадас лакэ па са, со кэрдас лакэ о Боаз,

17 ай щютас пашэ:

— Вов дас мангэ кодал шов меры сэмно ворбаса: «На болдэ-ту қай тири сокра Ѣющу вастэнца».

18 Наоми пхэндас:

— Рыбдисар эк-цэра, мурى щей, жи пун жянэса, со авла май дур. Чяк кадо мануш чи чендэшьяя-пэ, жи пун адес чи дэл гата кадо баё.

4

Боаз лэл ромнякэ ла Рута

1 Ай о Боаз андэ коды врама гэлас қаринг о пияцо паша лэ фороски бар ай бэшлас котэ. Кана о нямо, па кастье вов ворбияс, накхлас паша лэстэ, Боаз пхэндас:

— Ав катэ, муро пайтасы, ай бэш.

Вов авилас ай бэшлас.

2 О Боаз акхардас дэшэ женэн анда фороскэ барэ мануш ай пхэндас лэнгэ:

— Бэшэн катэ.

Ай вон бэшлэ.

3 Пала кадо вов пхэндас кодолэ нямоскэ:

— Наоми, сави болдас-пэ анда Моав, бикнэл котор э пхувако, саво сас амарэ нямоско, лэ Элимелехоско.

4 Мэ гиндысаддэм, кэ трубуй тэ пхэнав тукэ тэ кинэс лэс англа саворэ, кон бэшэн катэ, ай англа амарэ май пативалэ мануш. Алом тэ на кинэса лэс, пхэн мангэ, мэ тэ жянав. Кэ ту сан англуюн васт тэ кэрэс кадо, ай мэ сым о дуйто.

— Мэ кинав лэс, — пхэндас о нямо.

5 Атунчи Боаз пхэндас:

— Андо кодо дес, кана ту кинэса э пхув кай э Наоми, ту инкэ трубуй тэ лэс ромнякэ ла моавитянка, э Рута, мулэска пхивла, кэ кана авла тумэн Ѣяво, тэ ащел кады пхув пала челэдо лэ мулэско.

6 Алом о нямо пхэндас:

— Атунчи мэ наштык кинав кадо котор пхувако, анда кадо кэ мэ шай хасарав муро барвалилэ. Кин лэс май фидэр коркоро, ай мэ наштык кадо кэрэв.

7 (Андэ пураны врама андо Израиль, тэ кинэс вай тэ дэс кавэрэскэ э пхув, ехк анда лэ бикинэтора лэлас па пунро сандалия ай дэлас ла кавэрэскэ. Касаво цоккаши сас андо Израиль, тэ авэл о бикиныпэ андо законо.)

8 О нямо пхэндас лэ Боазоскэ:

— Кин коркоро.

Ай лас тэлэ сандалия.

9 Атунчи Boаз пхэндас барэ манушэнгэ ай саворэнгэ:

— Адес тумэ дыкхлан ай шундан кадо, кэ мэ киндэм катар Наоми са, со сас Элимелехоско, Килионоско ай Махлоноско.

10 Ай инкэ мэ лэм моавитянка э Рута, Махлоноска пхивла, мангэ ромнякэ, тэ ащел э пхув пала чөлэдэ лэ мулэско, тэ на хасайвэл лэско анав машкар лэ нямура ай андо лэско форо. Тумэ адес са дыкхлэ ай шундэ кадо!

11 Ай атунчи лэ барэ мануш ай са кон сас по пияцо, пхэндэ:

— Амэ са дыкхлам ай шундам. Мээк о Рай Яхва тэ кэрэл бутэ щаворэнги жювля, сави авэл андо тиро кхэр, сар э Рахиль ай Лия, савэ кхэтанэ ваздэ о кхэр Израилэско. Барар о барвалипэ андэ Эфрат ай лачи гира андо Вифлеем.

12 Мээк пэрдал парапутя, савэн дэла тут о Рай Яхва катар кады жювли, тири вица авла, сар вица кай о Парец, савэс Тамар кэрдас лэ Ехудаскэ.

Э краески Давидоски вица

13 Кадэ о Boаз лас ла Рута, айвой кэрдилас лэски ромни. Вов пашлилас ласа, ай о Рай Яхва дас лакэ тэ авэл кхамны, айвой кэрдас щявэс.

14 Жювля пхэннаас э Наомиякэ:

— Наис лэ Раскэ лэ Яхваскэ, Саво чи ашядас тут адес би наследникоско, саво лэла тэ дыкхэл пала тутэ. Мээк о щаворо тэ авэл гирэшо андо Израиль!

15 Вов дэла тут нэво траё ай сунуя тут по пхурипэ. Чяк вов аракхадилас кайтири бори, сави камэл тут ай май лаши тукэ, сар эфта щявэ.

16 Наоми лас щаворэс, пхиравлас лэс андэ ангала ай баарлас лэс.

17 Жювля, савэ траиннаас котэ, пхэннаас:

— Кай э Наоми аракхадилас щяво.

Вон дынэ лэс анав Овид. Вов кэрдилас дад лэ Иессеёско, кон сас о дад Давидоско.

Край Давид — парапутё о Boазоско ай э Рутако

18 Эта лэ вица Парецоски:

Парец сас о дад лэ Хецроноско,

19 Хецрон сас о дад лэ Рамоско, о Рам сас о дад лэ Амминадавоско,

20 Амминадав сас о дад Нахшоноско, Нахшон сас о дад Салмоноско,

21 о Салмон сас о дад Boазоско, о Boаз сас о дад лэ Овидоско,

22 Овид сас о дад Иессеёско, Иессей сас о дад Давидоско.

ИОНАСКИ КЕНЬВА

Иона нашэл катар о Дэл

1 Каринг о Иона, Амиттаёско щяво, сас ворба катар о Рай Яхва:

2 — Кидэтү, жя андо баро форо Ниневия ай пхэн манушэнгэ ворба, анда кадо кэ гира па лэскэ чёрэ бутя арэслас жи Мандэ.

3 Алом о Иона кидаспэ тэ нашэл катар о Рай Яхва андо Таршиш. Вов гэластар андэ Яффа, аракхлас бэро*, саво жяластар андо Таршиш, потиндас пал традыпэ ай бэшлас пэ лэстэ тэ усый катар о Рай Яхва.

4 Алом о Рай Яхва щюдас по море бари балвал, ай ваздаспэ касаво штормо, кэ о бэро сас тэ пхарацдэл.

5 Саворэ налара† дарайлэ, ай сако лас тэ рудий кай пэско дэл. Вон щюдэ андо паи са э пхаримата, савэ сас по бэро, тэ авэл вов май локхо.

Англа кадо о Иона мэкласпэ тэлэ андо бэро, пашлилас котэ ай сутас зуралэ соимаса.

6 Бэроско паранчёдаши авилас лэстэ ай пхэндас:

— Со ту совэс? Уще, рудинту тирэ Дэвлэскэ! Вов шай жутый амэнгэ, ай амэ чи хасайвас.

7 Э налара пхэннас екх екхэскэ:

— Тэ щюдамас жребиё тэ жянас, анда каастэ амэ хасайвас.

Вон щюдэ жребиё, ай вов сыкадас по Иона.

8 Атунчи вон пущлэ лэс:

— Пхэн амэнгэ, кон дошало андо кадо баё? Че бутяса лэсту? Катар жяс? Анда че тхэм сан? Анда че мануш?

9 Вов пхэндас:

— Мэ сым евреё ай дав патив кай о Рай Яхва, о Дэл лэ Черэско, Саво кэрдас море ай э пхув.

10 Иона пхэндас э наларэнгэ, кэ вов нашэл катар о Рай Яхва. Кана вон жянглэ па кадо, лас лэн бари дар, ай вон пущлэ:

— Ай че баё кэрдан?

11 Ай лэ моряко паи ваздэласпэ са май зуралэс ай май учес, ай атунчи вон пущлэ лэстар:

— Со тэ кэрас туза тэ чендершийпэ о паи?

12 — Лэн ман ай щюдэн андо море, — пхэндас вов, — ай о паи чендершияпэ. Мэ жянов, кэ кадо наслуз штормо пэлас пэ тумэндэ анда мандэ.

13 Вон лынэ тэ традавэн о бэро анда интреэги зор, тэ рэсэн жи кай пхув, алом вон чи биринас, анда кадо кэ о паи ваздэласпэ лэ балваляса инкэ май зуралэс.

14 Атунчи вон лынэ тэ мангэн лэ Рас лэ Яхвас:

— Эта, Рай Яхва, тэ на хасайвас амэ анда кадо мануш. Тэ на ёшс пэ амэндэ бэзэх анда мударипэ на дошалэ манушэско, чяк Ту, Рай Яхва, кэрэс кодо, со камэс Ту.

15 Атунчи вон лынэ Ионас, щюдэ лэс аври анда бэро, ай холярнико паи чендершийсалас.

16 Лас э манушэн бари дар катар о Рай Яхва, вон дынэ лэскэ жэртва ай солахадэ.

* **1:3** Бэро —'корабль; лодка'. Исконное слово цыганского языка (утрачено в некоторых диалектах). Происходит от древнеиндийского वेदा 'лодка, корабль'. † **1:5** Налари 'речник; моряк' — производное от ловарского нал 'река'. Нал, утраченное в ряде говоров, восходит в древнеиндийскому नाडि 'полый стебель; канал, русло'; в индоарабских диалектах гуджарати, панджаби и др. означает 'река'.

2***Рудилэ Ионаско***

1 О Рай Яхва кэрдас кадэ, кэ баро машё накхадас Ионас, ай вов сас андэ машески дёмра трин дес ай трин ратя.

2 Кана сас андэ дёмра э машески, Иона рудияспэ каринг о Рай Яхва, каринг пэско Дэл.

3 Вов пхэндас:

— Андэ брига манглэм лэ Рас лэ Яхвас,
ай Вов пхэндас мангэ палпалэ.
Мэ цыписардэм катар э мулэнги лума —
ай Ту шундан муро цыпипэ.

4 Ту щодан ма андо бифундоско паи,
вортага андо баро паенго ило;
круисардэ ман фолымата.

Са Тирэ таласура,
са Тирэ пая накхлэ па мандэ.

5 Мэ пхэндэм:

«Нашадо сым катар Тирэ якха;
алом палэ дыкхава Тиро сунто Кхэр».

6 Щерадэ ман лэ пая бифундоскэ,
ай лэнгэ чяра кхудэпэ по муро шэро.

7 По фундо, кай лэ харэнгэ вуны, мэклэмма,
ай пхувакэ лэкатура пхандадилэ пала мандэ тэ на путрэнпэ,
алом Ту, Рай Яхва, муро Дэл,
лан ма анда гропа жювиндэс!

8 Кана о траё мурдайвэлас анда мандэ,
мэ дэмма гиндо па Рай Яхва,
ай авилас муро рудипэ жи Тутэ,
андэ сунто Тири Кхангэри.

9 Кодал мануш, кон дэн патив хохавнэ дэвлэнгэ,
мэклэ чячюнэ Дэвлэс.

10 Ай мэ ашардэ диланца ло тэ анав Тукэ жэртвы.
Со щинадэм — кэро.

О фирипэ авэл катар о Рай Яхва!

11 О Рай Яхва дас аври лэ машескэ, ай вов щодас Ионас пэ пхув анда пэски дёмра.

3***Иона андэ Ниневия***

1 Ай по дуйто сас лэ Раски лэ Яхваски ворба каринг о Иона:

2 — Кидэтү, жя андо баро форо Ниневия ай пхэн манушэнгэ ворба, сави Мэ тукэ пхэнав.

3 Иона патяяс лэ Раско лэ Яхваско муй, кидаспэ тай гэлас андэ Ниневия. Ниневия сас баро форо — трубус май трин дес тэ пхирэс лэс опрэ.

4 Ай о Иона киздьсардас тэ пхирэл па форо ай накхлас кати шай тэ пхирэс тэла екх дес, ай пхэнлас:

— Па штарвардэш дес Ниневия авла пхагэрды!

5 Лэ ниневитянура патяе лэ Дэвлэскэ ай лынэ тэ на хан и тэ на пэн, ай саворэ — катар барэ жи кай цынэ — урадэпэ андэ чёрэ похтанэскэ гада.

6 Кана кады гира арэслас жи кай Ниневияко край, вов ушилас па пэско краицко тхан, лас тэлэ пэсэкэ краицка гада, урадас чёрэ гада ай андэ брига бэшлас по ватрако тхан.

7 Вов дас аври тэ пхэнэн андэ Ниневия:

— Краицко ай ранги ворба: «Мэк лэ мануш тэ на хан и тэ на пэн, ви э алатура: гурвура, бакрэ ай бусня — тэ на хахавзэнэ пэ мал ай тэ на пэн!»

8 Мэк ви манушэн, ви алатон щяравэн чёрэ похтанэнца. Мэк сако анда са пэски зор мангэл лэ Дэвлэс. Мэк ашявэн пэскэ холярдэ бутя ай пэско насулыгэ.

9 Кон жянэл, кам шай о Дэл инкэ сунуй амэн ай парувэл о гиндо, кам тордярэл пэски ягалы холи ай милойпэ амэндар, ай амэ чи хасайвас».

10 Кана о Дэл дыкхлас, со вон кэрдэ, ай сар ашядэ пэскэ наслу дрома ай чёрэ бутя, Вов милосайлас ай чи бишядас пэ лэндэ бида, саваса Вов даравлас лэн.

4

О Дэл щитярэл Ионас

1 Лэ Ионааскэ кадо зуралэс чи чялилас, ай вов холяйлас.

2 Вов лас тэ рудийэлэл Раскэ лэ Яхваскэ:

— Эта, Рай Яхва! Па кадо мэ ви гиндыяс, кана сымас инкэ кхэрэ! Анда кадо ви нашлэм андо Таршиш. Мэ жянос, кэ Ту сан Дэл, кай кэрэл лашипэ, милако, рыбыдымаско ай барвало камаимаса, ай чи камэс тэ бишявэс бида.

3 Ай аканак, Рај Яхва, лэ муро ди, анда кадо кэ май федэр тэ мэрав, сар тэ трайй.

4 Алом о Рай Яхва пхэндас:

— Тукэ трубуй тэ холяйвэс кадэ?

5 Иона дас аври анда форо ай бэшлас пэ риг, кай ваздэлпэ о кхам. Котэ кэрдас анда кранжи сыр цынкалово, бэшлас тэлэ андо щялин ай лас тэ дыкхэл, со кэрдёла лэ фороса.

6 Ай о Рай Яхва кэрдас тэ барол о бур, саво ваздаспэ май учес, сар Иона, тэ на хал вов кино катар о кхам, ай Иона лошаяс кадалэскэ.

7 Алом по кавэр дес, коран, о Дэл бишядас лэ кэрмэс тэрагий о бур, ай о бур шутилас.

8 Кана о кхам ваздилас, о Дэл бишядас пхабарды балвал, ай о кхам лас тэ пхабарэл лэ Ионааско шэро. Вов кадэ кинозысайлас, кэ камлас тэ мэрэл ай пхэндас:

— Май федэр тэ мэрав, сар тэ трайй.

9 Ай о Дэл пхэндас Ионааскэ:

— Тукэ трубуй кадэ тэ холяйвэс анда бур?

— Трубуй, — пхэндас о Иона, — на фэри тэ холяйвав, ай ви тэ мэрав.

10 Алом о Рай Яхва пхэндас:

— Ту бунус анда буроро, пала саво чи грыжысас, саво чи баардан. Вов барилас тэла екх рати, ай тэла екх рати хасайлас.

11 Ай сар Мэ тэ на сунуй боро Ниневия, кай на фэри бут алатура, ай май бут сар екх шэл тай биш эзэра мануш чи жянэн, кай си чячи риг, ай кай э стунго?